

tur, ut dictum in axioma 3. Sed heterodoxi prius amplectuntur doctrinas suas, quam eas ad scripturam examinent: nam ediscunt libellos catecheticos, & ex iis hauriunt doctrinas jam definitas, ac determinatas, antequam ullam sacram paginam inspexerint, ut patet ex sup. pos. 6. Ergo non sequuntur methodum suam fundamentalem. Quod erat demonstrandum.

IV. *Demonstratio.* Qui munus in se suscipit, rem suis rationibus & momenti expendendi, is non præstat, quod suscepit, si stat alieno iudicio, neglectâ cognitione causæ, ut patet ex axioma. 4. Sed plerique heterodoxi in multis, quæ non satis cognoscunt, nec cognoscere possunt, stant alieno iudicio, nempe eorum, qui confessionem fidei adornarunt, ut patet ex hyp. 7. Ergo illi non præstant, quod in se susceperunt: ergo non sequuntur methodum suam fundamentalem. Quod erat demonstrandum.

V. *Demonstratio.* Qui sibi certam quandam regulam proponit, ex qua iudicet, is animo æquè benevolo & attento audire debet omnes, qui ad hanc regulam appellant; agitque laudabiliter, si quàm diligentissimè inspiciat, quinam inter dissidentes propius ad regulam propositam accedant, ut dictum in axioma. 5. Sed quilibet privatus apud heterodoxos sibi proponit certam quandam regulam, nempe scripturam sacram; ex qua, & secundum quam iudicet; adhæc variæ sunt sectæ inter se discrepantes, quæ ad unam eandemque regulam appellant, scripturam sacram unice inclamantes, ut patet ex primo principio universali. Ergo quilibet heterodoxus debet varias illas sectas omnes animo æquè benevolo & attento audire; agitque laudabiliter, si quàm diligentissimè inspiciat, quinam inter dissidentes propius ad regulam accedant. Atqui id multi ex heterodoxis non faciunt, neque, si faciat quispiam, apud suos censetur facere laudabiliter: plerique enim Lutherani, si fundamenta doctrinæ Calvinianæ & Socinianæ diligenter explorare velint, vituperio potius quàm laudè a suis censentur digni, ut patet ex hyp. 8. Ergo heterodoxi non sequuntur, methodum suam fundamentalem. Quod erat demonstrandum.

Omnia ad Majorem Dei Gloriam.